

醒心真經

開經偈

禍福無因惟人自取吉凶休咎惟天所與善惡之報不爽錙黍改過自新天曹獎許

爾時無上仙師雲遊空中見有黑氣障蔽紅光潛消知天下之人為善者少作惡者多輪迴六道旋轉四生未有窮盡而若輩作惡之人不知不覺冥頑不靈晨鐘報曉遂起慾心暮夜不休無非私意私慾不絕惡端日起不忠於君不孝於親不敬於師不信於友私其妻子傷其手足慢其尊長薄其親戚同室操戈負恩反噬殘忍殺命昏劣蔑理倚勢凌弱結黨暴寡造計害人

道藏輯要

五經合編
醒心真經

聖

室集四
X X 1

唆訟漁利縱役縱僕殃民肆虐機械變詐作為不法欺謀孤嫠侮弄老穉取不義之財淫非己之色奪人之產坑人之貲擠人之危困人之窮壞人之名敗人之功阻人之善抑人之才傾人爵位損人財物破人姻親間人骨肉構人爭鬪誣人過失談人閨闈辱人婦女謗人伎術截人生路發人陰事負人重托背約違誓翻雲覆雨誘人為非助人作惡好人所惡惡人所好言不忠信行不端正曲直違心毀譽隨意訕謗聖賢褻瀆神明仇敵正人狎昵匪類身居下流甘為汙賤玷辱祖先貽憂父母行險徼倖苟免無恥貪得無厭知過不改怙終遂非聞諫加怒耽樂賭博迷戀花柳好勇鬪狠酗酒詈罵聚談穢妄興劇戲耗難

得財作無益事不惜物力不重五穀殘毀經書拋棄字紙居不
學業動不循禮知德不酬忘本不憶敗廢祖產暴露亡柩臨喪
不慎致祭不誠制中生子亡忌舉樂居室不和教子不嚴待下
不恕撫幼不慈治家無法貽謀不善嫁娶不時致生淫佚分撥
不均致生爭鬪奢僉違宜事失體制當爲不爲營求分外見富
妄圖見貴艷慕失足不悟濡首不止飾貌盜名違道干譽喪已
徇人矯情絕物觀理不清聽言不察知人不明交友不擇接待
不恭出語不謹處分不當當局不慎小忿不懲遠患不慮立志
不高居心不一古訓不遵師傅不習省過不勤檢身不力負慚
大廷獨欺暗室種種過惡不可枚舉又見縉紳大夫則患得患

道藏輯要

五經合編
醒心真經

哭

室集四
×××

失逢迎固寵賄賂公行治安莫講不憂國事不念民瘼損下益
上酷刑濫罰聚斂有才聽訟無術見利不興見害不革好爵是
糜實曠厥職文人學士則荒廢經傳奔競功名矜才炫能誇已
忌人又或造作淫書蠱惑士女捏成野史淆亂是非流害無窮
作孽莫大庸夫俗子則胸無點墨目不識丁輒冠儒冠服儒服
徒思蠅營狗苟不知返本窮源稍得寸進面貌昂然蔑視小民
傲睨先輩遇單寒則掉頭不顧見顯達則搖尾乞憐刻剝窮人
錙銖必較守財慳吝見義不爲不度才不量力強不知以爲知
假不能以爲能附會斯文胡謔滿紙見人著作妄肆譏評區區
斗筲言之可恥少年子弟則製美而衣擇腴而食悠忽終年嬉

遊竟日不知稼穡艱難不念寸陰堪惜老大無成傷嗟何及農
工商賈則漲五穀以入市雜贗物以取利貴物賤買低貨高賣
價不隨值錢不卽給秤戩斗尺不公不平出輕入重出小入大
欺謾愚穉凌壓孱弱造作不固効力不勤暗設魘魅浪費工料
損人損物天之所怒藝術九流則學業未精便思行世輕視死
生妄談禍福小則傷人財誤人事大則隕人命絕人祀豈惟人
怨且有天刑吏胥隸役則婪贓作弊舞文弄法增減事情出入
人罪縱奸陷善罔上行私錢糧恣其侵漁詞訟任其起滅多詐
編氓凌辱士子此等之人永墮地獄仙佛不度廝養奴僕則食
人之食不思忠人之事居人之宅不知感人之恩當面趨承背

道藏輯要

五經合編
醒心真經

宅

室集四
×文七

後訕笑明中効力暗裏侵財心不安於貧家禮每失於辱主旣
已委身奉事又復蓄念他圖犬馬不如神人共憤婦人女子則
性本陰柔見多偏隘每爲乾餼啟釁常因長舌興殃非無禮於
舅姑卽失和於妯娌非苛虐其子婦卽妒嫉其媵妾傾女君以
邀寵凌夫子而自尊骨肉成仇親姻不睦罔知四德靈曉三從
至有帷薄不修淫奔可醜旣玷本宗又辱夫族決江河之水難
洗其羞迴日月之光不照其穢更有身爲牙媪口習誑言誤人
婚姻將拙配巧誘人子女掠良爲賤喜爲引線之針最壞名閨
之節一淪地獄永失人身僧尼道士則不解經典不守戒律淫
慾未絕葷酒莫除借端化財實圖鋪啜勸人禮懺徒爲金錢方

便不聞慈悲安在建醮則天神絕響作會則男女混雜何曾見
性明心未見葆精煉炁勞逾白屋濁倍紅塵孽豈易消罪應加
等是諸人等所作過惡習與性成毫不自悔所以黑氣凝結聚
而不散昏昏然如霧障天遂遂然如魔附物自古及今茫茫苦
海無時得度而若輩漠然安之羣然趨之陷溺日深可爲隕涕
若夫爲善之家百不得一或資生無產不能自振或同志無人
不知自奮或阻於時勢廢焉不前或抑於流俗喪其所守或勉
強爲善而志實不堅或中心向善而力有不足或一時從善不
能淑其終身或一已好善不能化其眷屬或始念甚誠中道改
轍或力行不怠偶爾蕩心或功夫未到妄想非分或造詣將深

道藏輯要

五經合編
醒心真經

冥

室集四
×文三

忽求效驗如是爲善卽爲人惡根苗所以善氣上達方起卽伏
無上仙師雖復憐憫無可奈何可勝浩歎今爾等若欲消除黑
氣大放紅光須聽偈言香火何時滅滅了又重然人於大海中
百千億萬年生老病死苦終身被牽纏因緣念上起念上起因
緣夢覺卽無夢泡影亦虛懸電光石火中埋沒許英賢那見杰
出者不是活神仙傷畢願爾等大眾生生世世在在處處永不
起貪得心瞋怨心殺傷陷害心忤逆凌犯心奸淫偷竊心占奪
爭鬪心欺蔑侮弄心奸詐誑騙心嫉妒毀謗心諂媚趨附心驕
矜傲慢心慳吝苟簡心奢靡逸樂心妄想分外心求謀鑽刺心
眷戀富貴心憂愁貧賤心計較得喪心分別爾我心炫耀名譽

心遮蓋過失心瞞昧自欺心膠執自是心疑惑猶豫心懊悔改
變心畏難退縮心安逸自在心苟且小就心責效旦夕心如
是等心各各猛省務使方寸之中空空洞洞一物不交一私不受
如皓月當空萬境澄徹如明鏡照人鬚眉畢現更如慧劍在身
可以水斷蛟龍陸剗犀象斯爲夢醒不在大夢又常起怖懼心
慙愧心歡喜心決斷心勇猛精進心堅固耐久心凡此等心須
以大智慧照之大精神赴之大力量任之斯能無微不燭無堅
不破無難不成身混塵俗志氣清明與天地合其撰與鬼神合
其德何有於仙何有於凡何凡之非仙何仙之非天道化一理
天人一家黑氣消滅紅光燭天是謂大醒永不入夢夫其有黑
道藏輯要

五經合編
醒心真經

巽

室集四
八文上二

積者或以月計或以歲計或以世計蓋非一朝一夕之故其所由來者漸也積其善可以一世可以十世可以百世可以千萬世可以無有盡世積其惡輕或可以二世重則不能一世吾觀普天之下有積德礪行半生輒軻時至事起一朝榮顯者又有簞瓢樂道終身窮餓百年之後究與蘭蕙齊芳日月爭光者又有盡心事國殺身成仁名既留於身後福亦降於子孫報或顯於來世祿必享於天曹者又有富貴之家偶行不義福消孽積罰及後人者又有衣冠之子未聞大道身多疵病受累無窮者又有蚩蚩之輩不知三尺敢作非爲輒罹法網者又有凶暴之徒橫行無忌罪惡貫盈身家破壞者是非天道不齊皆由其家

道藏輯要

五經合編
醒心真經

辛

室集四
×文三

積善積不善自所召致不足疑怪蓋天道人事默相符合不爽毫髮亘古如斯於今爲烈智者知而信之則可以寡過可以致祥愚者不信則禍不旋踵人苟欲除殃積慶務須遵守吾教大醒自心勿許一念游移勿許一時間斷久久自然黑氣全消紅光繚繞不獨一身榮昌子孫亦獲吉慶不獨一家康泰一里盡得消殃但吾教立立之之又立識得立立之神仙有傳不識立立徒事談玄謂之瀆仙罪亦彌天謹守吾法慎毋畧焉愚蒙比比願爾先覺更以覺世功亦齊仙面是背非報應必顯尙其勉旃大眾寂靜諦聽僞言道德無終亦無始善則福臻惡禍至若能滌慮并洗心從前作孽皆堪恕我今大開方便門願引愚蒙同

入道勿謂不覺與不知天曹日日關心竅

呂帝親示奉行規條果報

一凡讀是經者務於每日清晨盥漱焚香洗心滌慮志誠朗誦此經一遍然後料理諸事不得束置高閣

一持誦之後務須潛心玩味身體力行每夜省察一日所爲有何罪惡久久行之自然功多過少慶集殃消不得口誦身違虛應故事

一是經爲救人度世之經有能刻板流傳者自身榮昌子孫吉慶有能刷印廣施者救諸苦厄凡事如心有能奉行不倦有功無過者不論人等卽成仙佛有閉藏毀謗見不奉行者殃

道藏輯要

五經合編
醒心真經

至

室集四
川又上

及一身禍流後代慎之慎之

以上三條係

呂帝親示讀者務觸目警心依教奉行勿徒作文字看過有幸
聖訓